

Aningaasanut tunngasumik ingerlatsivimmik (finansiel virksomhed), tassannga aningaasaateqarfik, sillimmasiisarfik, soraarnerussutisiaqarfik kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqquneqarnissaannut Inatsisartut aalajangiiffigisassaattut siunnersuut. Nalunaarusiaq UKA2026 aallartinnginnerani Inatsisartunut agguanneqassaaq.
(Inatsisartuni eqimattak, Naleraq)

Akissuteqaat

Siullermeerinninneq

Naalakkersuisut siunnersuut qujassutigaat.

Nunatta aningaasaqarnermut immikkoortumi iliuuserisinnaasaasa piginnittuuneratalu nukittorsarnissaanik kissaateqarneq Naalakkersuisut isumaqatigaat. Aningaasat aningaasalersuinermilu nukiit annertunerusumik inuiaqatigiinnut iluaqutaasumik nunatsinni ingerlanneqarnerunissaannik anguniagaqarnikkut qulakkeerinnikkumaneq akuersaarnartuuvoq. Ingerlatsisut soorlu SISA nunatsinnilu sillimmasiisarnernik soraarnerussutisiaqartitsinermullu akunnermiliuttut nunatsinni aningaasat kaaviiartinneqarnerannut ilapittuisuupput. Aningaasalersuisarnermik immikkoortup qanoq ineriartorteqqinneqarsinnaanerani ingerlaavartumik nalilersuisarneq naapertuullunilu iluaqutaavoq, tamatumani immikkoortut pisortat namminneq annertuunik aningaasartuuteqarfigisaat immikkut aallutaralugit.

Aningaasanik ingerlatsivinnik nutaanik pisortanit pigineqartunik pilersitsineq annertuunik aaqqissuussaanikkut aningaasaqarnikkullu ilungersunartunik nassataqassasoq, Naalakkersuisut naliliipput. Tassani ilaatigut aningaasalersuutininik, aarlerinaatit siaruarnissaannut, immikkut piginnaasanut ingerlaavartumillu ingerlatsinermut piumasaqaatit ilaapput. Niuerfimmi namminersortunik aningaasanik tunngasunik ingerlatsivinni neqeroortunik peqareerpoq. Nunatsinni pisortat ingerlatsiviat assersuutigalugu inunnik isumaginninnermut peqqinnissaqarfimmullu immikkoortumi ilinniartitaanermulluunniit immikkoortumi pisortat pingaarnertut isumagisassaannik passussinissamik pingaarnertut aallussinissaat, Naalakkersuisut oqaatigiumavaat. Nunatta Karsiata aningaasaataasa suliffeqarfinnik namminersortunik ingerlareersunik unammillernissamut atorneqarnissaannut atatillugu mianersornissaq, Naalakkersuisut taamaalillutik ataatsimut isigalugu kaammattuutigiumavaat.

Tamanna assersuutigalugu pisortat ingerlatsivii akimorlugit illuatungeriilluni sillimmaseeqatigiissinnaanermik, imaluunniit ataatsimut aaqqissuussinernik aningaasaqarnikkut naammassinnissinnaassutsimik nukittorsaasumik aningaasanillu piffimmiiginnartitsisunik periarfissanik naliliinikkut pisinnaavoq. Misissueqqissaarnermik suliaqarneq taanna Naalakkersuisut Siulittaasuata Naalakkersuisoqarfiata ataani,

Ineqarnermut, Attaveqarnermut Isorliunerusunullu Naalakkersuisoqarfimmit taperse neqarluni ingerlanneqarpoq. Misissueqqissaarluni suliaqarnermi immikkoortut arlallit ilaatinneqarput. Siunnersuut saqqummiunneqartoq suliner mut tassunga ikorfartuutitut isigineqarpoq.

Naalakkersuisut taamatut paasinnillutik aalajangiiffigisassatut siunnersuut saqqummiunneqartoq tapersersinnaavaat.

Naalakkersuisut taamaalillutik nassuiaammik paasissutissinneqarnermik toqqammaveqarluni kingusinnerusukkut oqaloqatigiissuteqarnissamik toqqammaviusinnaasumik suliaqartoqarnissaa qulakkeerniarpaat.